

# ЛҰИМА СЭРИПОС

23 мая  
2019 года  
№10  
(1196)

Общественно-  
политическая газета  
Ханты-Мансийского  
автономного  
округа-Югры

[www.khanty-yasang.ru](http://www.khanty-yasang.ru)

E-mail: [gazeta@khanty-yasang.ru](mailto:gazeta@khanty-yasang.ru)

Основана 11 февраля 1989 года



В. Узель вӑрум хури

Ты хурит Ханты-Мансийск ўст ѓлнӑ мӑнӑщи ӑгиришит пӑслым ѓлӑгыт – Оксана Вадичупова, Даша Мерова, Жасмин Мерова ос Тӑня Гарильчик. Тӑн «Тӑрум Маа» музейт мӑнӑщи супыт ос Анатолий Вадичупов вӑрум сӑнквылтапыт, нӑрнӑйвыт ос тарыгсыплувый-выт суссылтасыт. Ты ѓвылтыт 16 лӑпсыт ловиньтӑн.

Ты  
номерт  
ЛОВИНЬТӢН:

Мӑнти  
лӑтӑанув  
ханищтан  
нӑпак ат  
ѓньцӑв

2

Хӑнтыт  
порсум  
хӑтпат  
номавет

5

Сосса мир  
янытлан хум

8-9

Акиюв  
ѓл-щӑпитым  
мӑтӑ  
Хӑнтыслӑв

13

Акв ӑтипӑлат  
мӑхум музейн  
вӑвыглавӑсыт

16

## ЛҸХХАЛЫТ

# Колтаҕлыт округ кўщайн янытлавёсыт

**Я**ныгполь этпост округ кўщай нэ Наталья Комарова йильпи саккон нэпак хансыс, ань яңк нәтнэ этпост мән өлнэ мав янытыл колтаҕыл сәт вос щёпитаве. Тувыл ты тәла 11-17 хөталыт кәсың үст ос районьт блыс, сәвсыр хөнтхатыглапыт вәрыглавёсыт.

Акв тамле эрнэ тәла Ханты-Мансийск үс яныг пўльницат блыс – ущ самын патум ныврамың колтаҕлыт янытлавёсыт, руц щирыл ләваве: акция «Торжественная выписка». Омат ныврамың өт пўльницаныл юв тәртнәныл порат, тув леккарыт, ляххал тотнэ ос нәтмил вәрнэ махум атхатыгласыт. Тән халанылт Наталья Комарова блыс.

Округ кўщай нэ тох ләвыс: «Тамле ялпың хөталыт мән колтаҕлыт янытлэв. Омат-әтәт нывраматыңыл мұсхал щирыл вос янмалтыяныл, мастыяныл, тыттыяныл, эруптым вос оныщияныл. Тән емас хөт-

паг вос яныгмәгыт, колтаҕыл махманыл вос эруптыяныл, рұтаныл вос вәгыныл. Мах таи емас, хунь ныврам самын паты. Кәсың щәмьят пуссын щәгтәгыт, самын патум мән элүмхөласакве юв ўраве. Мән ань сунсөв, хумус омат ныврамың өт юв тәртавет, рұт махманыл холыт емас номтыл лүляхөлэв».

Сәт омат ныврамың өт тыгле нәгылыс. Юлия ос Тимур Ефремовыг китыт ныврамың самын патыс, Арианаг намтыстән. Анастасия ос Валерий Третьяковыг ты бвыл пыгрищән, наме Даниил. Марина ос Сергей Гавриловыг колтаҕылт Ми-



лана агитән хұрмит ныврам. Ты ос мөт колтаҕлыт Наталья Комарован ос леккарытн янытлавёсыт, сәв емас ләтңыл ләввёсыт.

Нэпак хаснэ нэ Наталья Пивоварчик кәсың щәмьян «Сказки медвежонка Степана» мән ныврамың ловиньтан нэпак ос «Сладких снов, малыш!» наппа эргыт бщнэ диск мүйлуптас. Нэ тох ләвыс: «Ам хұрум ныврам янмалтәгум, вәг-

лум, мән хөтпа мөйт хұнтлуңкве сака таңхи. Хунь ёл-хуюптаве, мөйтыл вос мөйтаве. Төва потранум ос мөйтанум ам эрыг холыт щёпитасанум, дискын хасвёсыт. Ныврамаквет вос хұнтлэгыт, хумус мавит ўргалаңкве эри, юрт хөтпан нәтуңкве, ома ос әтә ләтың хұнтлуңкве эри. Пуссын пұстагыл өлән».

Светлана  
РОМБАНДЕЕВА

## Мәнти ләтңанув ханищтан нэпак ат бөныщөв

**М**әныщи ос ханты ләтңагув, культурав Мурыл миркол кўщаянув өт потыртаңкве кәсың хұрум этпос акван-атхатыглэв, руц щирыл тав Научно-координационный советыг ләваве. Ты сапрәнит кәсың порат округ кўщай нэ вәңын хумитә Алексей Шипилов пұңкоты. Ты щөс тав пентсылэ ханищтап департаментыг рұпитан хум Геннадий Забайкин махум атыгласанэ.

Өвлэт развитие образования институтт рұпитан кўщай вәңын нэ Виктория Ключова ләтың ләвыс, тав ныврамыг ханищтан хөтпат хумус рұпатанылт нәтавет, хумус тәнти ханищтавет, та урыл потыртас. Ханты ос мәныщи кўщаит ләвсыт, учителит ханищтан магсыл институтт рұпитан махум тәнти павлың школатын вос ялантэгыт, тох ищхй-

пың ут тәра тән этаныл потырым сака яныг онтас тәнанылн хунь ёмты. Ос ювле тән тох потыртасыт, мөтыт тәлныл тән школат ләтыл яласаңкве патэгыт, учителит хөт матырыл нәтуңкве эрөгыт, тәра нәтавет.

Ань школат ныврамыг ханты ос мәныщи ләтың урокыл ат ханищтавет, туп уроканыл астын юи-пәлт кәсащан

ныврамыг тәнти ләтңыл потыртаңкве ялэгыт. Тох вәим ләтңув сөймуңкве паты, шар мощца ныврам ханты манос мәныщи ләтңыл вәңкве кәсащи. Урокыт порат ос таимәгыс ат ханищтавет, учебникыт сака пёсыг ёмтсыт, та хосыт рұпитаңкве ат рөви.

Туп акв школат Полноват павылт ханты ләтың урокыт вәрыглавет, тот школа кўщай такви тох номтэ патыс, мөтаныт пуссын хурахлэгыт, саккон коныпалн ат емасэгыт.

Туи ныврамыг ўщлахтын урыл Геннадий Забайкин потыртас, тав ләтңе щирыл округувт ты тәлн 13 млн 128 сөтыра

солкөви ўщлахтын магсыл тәстувес. Ты олнытыл 985 сосса ныврамакве ўщлахтуңкве паты. Ань кәсың мәт олныл мивет ос тот тәнти халанылт ләкква-уртыяныл.

Ты коныпал хум ләвыс, образование департаментаныл ныврамыг ўщлахтын мәт рұпитан колыт халт касыл вәрөгыт, ты касыланыл тох ләваве – «Лучшая организация отдыха детей и их оздоровления в ХМАО-Югре», тот акв номинация вәрим блы, мәныщи, ханты ләтңыг, культура өт рұпитан этнолагерит касуңкве вөрмөгыт.

Галина КОНДИНА



## ЛҲХХАЛЫТ

# Савнуй маньлат хотпа ань нѣтавет

**Хаништап ос маньлат мир политика департаментыт кўщай хум Алексей Дренин Ханты-Мансийск ўст «РИЦ» намп ляххал тотнэ колн ъхталас. Сосса маньлат агитпыгыт хумус ань нѣтавет, та урыл тот потыртас.**

2019 талнуй ман округут маньши, ханты ос ърн махум магсыл «Устойчивое развитие коренных малочисленных народов Севера» намп айльпи программа рўпитанкве ѳылтахтас ос хаништахтын агит-пыгыт айльпи щирыл нѣтуңкве патвѣсит.

Кўщай хум лавыс: «Ты талт пирмайтым программа щирыл, университетыт манос колледжит хаништахтын агит-пыгыт «региональный перечень профессий» намп нѣпак щирыл танки ойтнэ олнаныл ювле миңкве патсанўв. Ты элы-палт мантуп нусатотнэ агитпыгыт нѣтсанўв.

Тан хаништахты-

нэныл магсыл олнаныл ювле ойтсанўв, савсыр хаништахтын нѣпакыт, хаснэйвыт ос мот пормасыт, маснут магсыл олныл тастыгласанўв.

Сапранил олыглан порат маньши ос ханты махум акваг китыглахтасыт, манрыг ман туп ты агит ос пыгыт олныл тастыглыанўв.

Мот сосса маньлат махум ѳс вос нѣтавет. Ты юи-палт ман номсахтуңкве патсўв, сѳль, сав агит пыгыт хаништахтэгыт, щаняныл-ащаныл тан магсыланыл олн ойтэгыт.

Тан танки дипломнѣпак вуянтанэныл юи-палт юв ъхтэгыт ос сав ърнэ рўпата тыт вѣрѣгыт. Таимагсыл ты про-



Ищхипың мат-вим-хури

грамман ман айльпи лэтың хассўв ос ты «региональный перечень» лавнэ нѣпак вѣрсўв».

Нѣпакн 30 арыгкем профессият хасвѣсит. Ань агит-пыгыт лѣккарыг, ма-вит ўргалан, ўйхул пусмалтан, най харыгтан хотпаг ос сав мот профессиян хаништахтуңкве вѣрмѣгыт.

Ань университетыт хаништахтын маньлат хотпат акв тал сыс 100 сѳтыра солковил ювле ойтает, колледжит хаништахтан нѣврамыт 50 сѳтыра солкѳ-

вил ювле мивет. Заочный щирыл хаништахтан хотпат ты нѣпак щирыл ѳс нѣтавет.

Манхурип профессиян тан ань хаништахтуңкве вѣрмѣгыт, ты департамент ищхипың лѳпсѳт ловиньтаңкве рѳви. Нѣпак «Образование в Югре» намп лѳпсыт ѳлы.

Хаништахтын маньлат хотпат урыл кўщай хум ѳс потыртас. Тав лавыс, нуса тотнэ агитпыгыт университет манос колледж ѳстлан мус акваг щирыл нѣтуңкве патает, элалхаништахтын магсыл олныл тастает.

Тамле нѣтмилыл ань 599 маньши, ханты ос ърн маньлат хотпат мивет. Ты тѳла магсыл акв тал сыс округ бюджетныл 30 млн. солкѳви таставе ос 8 млн. солкѳви федеральный бюджетныл кѳтаве.

**Людмила  
ТЕТКИНА**

## Пувласпи-агм урыл потыртасыт

**Лѣккарыт ос савсыр миркол кўщайт «Народный фронт «За Россию» намп организацият сапранин акванатхатыгласыт. Мань павылкветт ѳлнэ махум хумус ань пусмалтавет, та урыл тан потыртасыт.**

ѳвлѳт «Народный фронт» отделеният кўщайг рўпитан нѣ Лариса Белоцерковцева лэтың лавыс. Ман округут касың талнуй савнуй махум пувласпи-агмыл ѳмтэгыт.

Ты тарвитың агм тара ке хѳнтаве, элумхѳлас пусмалтаңкве вѣрмаве. Ань ўсытт, яныг павлытт ѳлнэ мир лѣккар палт ялантаңкве акваг лавыглавет. Павлың махум ань хумус

уральтавет ос пусмалтавет, та урыл тав лѣккарыт ос миркол кўщайт китыгласанѳ.

Хальўс районт ѳлнэ мир пусмалтан вѣрмалы урыл миркол кўщай Владимир Фомин потыртас. Тав лавыс, тѳлы ос туи «Профессиональной патология» намп пўльницат рўпитан лѣккарыт мань павылкветт ѳлнэ махум уральтыяныл.

Тѳлы тан машинал район янытыл яла-

сэгыт, туи «Николай Пирогов» намп найңхапыл тув ъхталэгыт. Ань найңхап лўпта ѳтпосныл яласаңкве ѳвылтахты ос ѳвлѳт Саранпавылн тах мины. Павлытыт ѳлнэ махум акваг уральтым, лѣккарыт сав агм хѳнтэгыт ос тѳра пусмалтаңкве ѳвылтыяныл.

Тувыл найңхапыл ос машинал яласан лѣккарыт тѳва павылн кит тал сыс акв щѳс туп ъхталэгыт. Ты пора сыс махум савсыр агмыл ѳмтуңкве вѣрмѣгыт.

Владимир Фомин лавыс, мань павлытыт лѣккарыт касың тал ке ъхталасыт, ѳмасну-

вег ѳлнўв. Тѳнт савнуй элумхѳлас пусмалтаңкве вѣрмаве.

Ань Хальўс районт касың талнуй сав хотпат рак-агманыл хѳнтавет ос тыйл ѳтимыг ѳмтэгыт. Тох ул вос ѳлы, лѣккарытн тан ѳлнэ манылн савнуй щѳс ялантаңкве ѳри.

Округ янытыл ъхталам миркол кўщайт ты вѣрмалы урыл ѳс потыртасыт. Мот кўщайт ѳс лавыс, тан ѳлнэ манылт ѳс сав махум пувласпи-агмыл ѳмтэгыт, тот ѳлнэ мир ѳс вѳтихал уральтаңкве ѳри.

**Людмила  
АЛГАДЬЕВА**

## КҮЩАИТ РҮПАТАНЫЛ

# Ўшлахтын пора ты ляпамас

**М**ан мавт олнэ нйврамыт туи хумус ос хот ўшлахтункве патэгыт, ты урыл ляххал тотнэ колт потыр олыс. Тув хаништап ос маньлат мир политика департамент кўшай Алексей Дренин ёхталас, тувыл физкультура ос спорт кол кўшай нэ Софья Конух, культура департамент колт пунктотнэ нэ Ирина Кибкало, мирн нётмил вярнэ тэла палт кўшай ваңын нэ Тереза Пономарёва ос нйврам пусмалтан лёккар Софья Яковенко.

Алексей Дренин лавыс, округт олнэ нйврамытныл туи 80% савит агиришит ос пыгришит савсыр матт ўшлахтункве патэгыт. Тув 2 млрд 300 млн солкөви тастувес. Молты порат тыгыл мощшанув олн щёпиталвес. Това школатт лагерит аңк нятнэ этпост рўпитаңкве овылтахтэгыт. Савыңпалэ тай нйврамыт лўпта этпост ўравет.

## Рёгың ман ос тотыглавет

2019 талт 53 сөтыра арыгкем агиришит ос пыгришит манти мавт тах ўшлахтэгыт. Округ янытыл 573 организация рўпитаңкве паты – колың ос школаң лагерит, тованыл паршин колт олункве патэгыт, ты коньпал сав нйв-

рам тах вөр мат ўшлахтэгыт. 22 сөтыра 750 нйврам ос мот ман тотыглавет – Тюменский областын, Краснодарский крайн, Севастополь ўсн, тувыл Башкортостан, Татарстан ос Крым республикатн. Сэмыл щарщ ватан сака сав хөтпа ялэгыт, тот маттем пувлэгыт ос мощ пусмалтавет.

Хум лавыс, тан нйврамыт ёт рўпитан нэ ос хумит магыс савсыр хөнтхатыглапыт вэрыглэгыт, ханищтыяныл. Тан ань агиришит-пыгришит ёт мўсхал щырыл вос рўпитэгыт, матыр-ати вэруңкве вос хасэгыт. Нйвраманыл кэсмостал ул вос ёмыгтэгыт, хотмус вос ёнгалтыяныл – ёрнэ тэлатын вос ханищтыяныл, пўмыщ ёнгилыт ос савсыр конкурсыт



вос щёпитэгыт. Ўшлахтын магыс сыресыр сменат щёпитасыт – физико-математический, краеведческо-туристический, гражданско-патриотический ос мот намың тэлат.

## Касыл – ты ёмас тэла

Физкультура ос спорт щырыл ос ўшлахтункве патэгыт, ты урыл Софья Конух потыртас. Тав лавме щырыл, тамле лагеритн 55 сөтыра 300 нйврам ялантаңкве паты. Мань павлытт спортивный клубыт олэгыт, тув 3 сөтыра 340 нйврам мины.

Округув янытыл тамле 40 кол щёпитавес. Нйврамыт тот хөтал палыт физкультура вэруңкве патэгыт, хўтсаңкве, зарядка вэруңкве, хайтыгтаңкве, поргашлаңкве патэгыт. Щар мак кэркам нйврамыт рёгың ман тотыглавет. Крым Республика Алушта ўст спорт тэла яныг кол-капай олы, тув 590 агиришанув-пыгришанув ўравет.

## Пуссын хунь кэркамыт

Тереза Пономарёва агмың-мосың нйврамыт овылтыт потыртас. Лўпта этпос пэс-ныл тан магысланыл

29 колт махум рўпитаңкве патэгыт, тот 3 сөтыра арыгкем нйврам пусмалтавет тах. Тованыл ос мортим ман тотыглавет – 700 агириш ос пыгриш, 290 хөтпа Тюменский областыт ўшлахтэгыт тах. Нусаг олнэ колтаглыт, мот щёмыян вуим нйврамыт ос пуссын нётает. Хотьютаныл матыр тэровит агм оныщи, пусмалтавет, округувт 4 сөтыра арыгкем тамле нйврам олы.

Культура тэлан хаништахтын мань махум магыс округ янытыл 380 кол щёпитавес, 350 сөтыра нйврам тув ялантаңкве патэгыт. 50 хөтпа Белоярский район Касум павылыл тотыглавет, тованыл Сургутский район Салым павылыл ос Нягань ўсн.

## Ўргалаңкве патавет

Ты кўцаит лавсыт, нйврамыт ўшлахтын мананылт 400-кем лёккар рўпитаңкве паты. Тувыл тананыл ўргалан магыс сав охраник хөтпат, най хартыган ос люль пищхуйтнэ ут капаит пувнэ махум рўпитаңкве патэгыт.

**Светлана  
РОМБАНДЕЕВА**




«Лыың союм» лагерь нйврамыт



## ПОБЕДА ХӨТАЛ КАСТЫЛ

## Хөнтүт порсум хөтпат номавет



**Я**ныг хөнт порат хөнтан  
маныл сав элүмхолас вой-  
нан тотвёсыт. Това хөтпат мот мāt  
вāнэтāl акваг хулытсыт, юв ат ёхты-  
сыт. Та пилыщмаң порат сав махум  
порславёсыт. Ань тāнаныл кāстын  
мāгыс «Төрүм Маа» музейт «Отыры  
Великой Победы — 2019» нампa сус-  
сылтап щёпитālвес.

Ты суссылтап вā-  
труңкве Кондин-  
ский пāвыл Н.С. Цех-  
нова намыл маим му-  
зейт, Междуреченский  
пāвыл культура колт  
ос Ханты-Мансийск  
үс овыл школат рүпи-  
тан хөтпат тāн нёт-  
сыт. Күщай вāнын нē  
Евгения Касатова тох  
лāвыс:

«Нилахкем тāl юв-  
ле хулытум порат мāн  
яныг хөнтүт порсум  
махум ос ветераныт  
урыл суссылтапыт щё-  
питаңкве патсүв. Ов-

лэт Хāльүс, Белоярский,  
ань ос Кондинский рай-  
онытныл хөнтлам мāн  
тотым сасса махум  
урыл суссылтап вāрсүв.  
Ты махум мāн акваг  
номуңкве патыянүв.  
Ань мир ёмщакв олнэ  
мāгыс тāн пилтāl мā-  
төв вуянтасыт».

Яныг хөнт олүм по-  
рат Кондинский рай-  
онныл 3 сōтыра 258  
элүмхолас войнан то-  
твёсыт. Ты махумныл  
онтоловхуйпов мāнь-  
щи ос ханты хөтпат  
Ермак, Нахрачи, Ильи-

чевка ос Каурья пāв-  
лытныл олсыт. Ань ты  
сосса махманув хөт  
хөнтлысыт, тот ты урыл  
потыртавес ос тāн ху-  
рияныл суссылтавё-  
сыт.

Война элы-пāлт  
Кондинский рай-  
онныл олүм кит сасса  
хумыг К.П. Механош-  
кин ос П.Я. Панов «Ге-  
рой Советского Союза»  
намыл майвёсыт. Тэн  
памятникагөн ос о-  
парищ намагён Ханты-  
Мансийск үс «Парк По-  
беды» нампa хөнтлум  
махум янытлан мāt  
āхвтас тармыл хансым  
олэг.

Пёс махум потыр-  
тālсыт, 1941 тāлт Кон-  
да я хосыт сав карай  
хүл сэруңкве алгаль  
минас. Налыманкем  
метра пāлыт хүлпыт  
пуссын тāглэкв хүлыл

шалтыглавёсыт. Кā-  
сың колт кит-хүрум  
пұшка солвалтым хүл  
ощсыт. Төнт яныг хөт-  
пат потыртасыт, тисā-  
вит хүл нэмхуньт ат  
олыглас. Сав кāрай хүл  
Конда ян шар мōрсың  
порат ёхталас, матыр  
люль вāрмаль ёмты.

Соль, 1941 тāлт лүпта  
этпос 22 хөталэт алпыл  
нила щёст яныг хөнт на-  
к та ёмтыс. Тувыл Кон-  
динский районныл хөн-  
тын тāнки вōвхатам  
хум хөтпат 24 щислат  
мāв вуянтаңкве овыл  
нāиңхāпыл та тотвёсыт.

Мāхум номсысыт,  
война хоса ат  
паты, молях пōйты.  
Тыимāгыс экват хум  
хөтпаныл эргим хөнт-  
лын мāн кётсаныл.  
Төнт нэмхотьют ат вāс,  
ты пилыщмаң хөнт  
нила тāl паты.

Ты хөнт олүм тāлыт  
сыс, мāв вуянтым сав  
элүмхолас порславес.  
Кāсың щёмьян тārвит  
ёхтыс. Хотьют о-  
патэ, хотьют āтятэ,  
хотьют нāвраманэ порславё-  
сыт. Това хөтпат рута-  
нылн ань тыг мус кин-  
савет. Ты вāрмаль ма  
янытыл нэмхуньт ат  
ёрувлаве. Мāн яныг хөн-  
тыт хөнтлум махма-  
нув акваг номуңкве ос  
касталаңкве патыянүв.

Николай МЕРОВ



# Күщайтн тэланув уральтавет

**Г**убернатор ваҥын хум Алексей Шипилов ты этпост сапрәни вәрыглас, тув сасса махум тэланыл эт рупитан хөтпат акван-атыгласанэ ос тән савсыр вәрмалит урыл потыртасыт. Сапрәни ишхыпың ут хосыт суссылтавес, районьт ос ұсыт потрыт хұнтлам махум матыр ювле-ләвуңкве вәрмысыт.

**Ө**вләт тән Сургутский районт өлнэ хантыт, мәньшит ос ёрныт олупсаныл овылтыт потыртасыт. Тән уранылт Лянтор ұсныл Вера Кондратьева тох лавыс, сасса махум тэланыл уральтан ос тән ётаныл хөнтхатыглан мағыс тән Советанылт рупитан күщайт тәнки кәсың павылың ялантәгыт.

Ты тәлт Русскинская ос Угут павлыгн ялсыт, тот махум тәнки мағысланыл вөрт найив атнэ сәкконьт урыл потыртавёсыт. Вөрт өлнэ сасса хөтпат вөрныл найив юв тотуңкве тәртавет кос, ос ты элы-пәлт павланылт рупитан лесничестван заявление вос хансәгыт.

Кол ұнттын мағыс 25 тәл сыс акв щёс нөр тотуңкве тәртавет. Найив атнэ мағыс манос матыр ұнттын мағыс ты вәрмалит тәра ос вәпаттыяныл. Ос эрнэ нәпакыт тәл наскәсыг сутытаңкве вәрмавет.

Совет-хөтпат Сытомино павылың ялманыл порат тот өлнэ махум эт нәлок-олн ойтнэ вәрмалит урыл потыртасыт, тувыл төват коланыл мағыс ЖКХ палт әрнта өшнәныл. Ты тәлат пуссын әрталавёсыт ос ёмщакв щёпитәңкве патавет.

Хальўсныл сасса махум тэланыл эт рупитан нә Любовь Кашлатова потыртас. Тән Хальўс

район миркол пәлыл 2017 тәлт Совет вәрсыт ос савсыр вәрмалит ёмщакв щёпитан мағыс акван-атхатыгләгыт.

Сав хөтпа тот рупата ат өньщәгыт, ты вәрмаланыл паттат лөўсаң өләгыт. Махум пусмалтан мағыс матыр нётмил ос вәрәгыт. Районт өлнэ павланылт агитпыгыт кәркамьг өлуңкве ләвавет, этноспорт касылыт вос кәсәгыт ос матыр мащтырлаңкве вос ханищтахтынувыт.

**Т**ән Ягримт хұрум ханищтап щёпитәлсыт ос махум тув вөвыгласаныл. Тәлы машинал тув кұстырнув ёхталаңкве. Ань сасса махум акван-атхатыгланәныл мағыс тот ёмас центр вәрвес.

Любовь Васильевна округ миркол күщайтн тамле латың лавыс, Кульпас павылт мәньши махум пёс олупсаныл суссылтым «Найотыр Маа» нампa музей 1991 тәлныл рупиты.

Округувт тьи шар овыл ұнттым этнографический музей. Та сыс та коланыл, сұмьяханыл, нәмхұнът ёмщакв ат щёпитәлвёсыт, мөт пормасыт ос пуссын пёсыг ёмтсыт. Күщайт олн тув янас вос тәстынувыт.

Туи Ясунтыт өлнэ «Мәнь Ыскве» няврамыт ўцхлахтын коланыл 25 тәлэ төвлы. Ты урыл күщайт ос номияныл ос матыр нётмил тах вәрәгыт.



Ишхыпың мат вим хури

**С**апрәнин акван-Сатхатыглам күщайт мөт районуыт өлнэ махум ләтңаныл ос аквёет номсұңкве ләвхатсыт. Төва мат махум эрнэ тәрпи тәл хультәгыт, тән ты вәрмалит вос ваганыл ос мир пусмалтан колныл тәра вос нётнувет. Вөрт өлнэ хантыт, мәньшит ос ёрныт вөраян, хұл алыщлан ос найив атнэ сәкконьт ёмщакв атваганыл, осполициян тот та пувавет.

Ань кәсың ұст ос районт сасса махум тэланыл эт рупитан Советыт таимәгыс ты вәраравет. Советын акван-атхатыглан хөтпат эрнэ сәкконьт урыл акваг вос потыртанувыт.

Тувыл Лямино павылт манос Лянтор ұст сасса няврамыт мағыс янас интернат ұнттын урыл потыртаманыл порат мощ воритотсыт. Хоты павылт манос ұст ұнттуңкве әри ман ат әри, ань ты урыл ёмщакв номсахтуңкве ләввёсыт.

Культура вәрмалит овылтыт Ирина Кибкало ос мирн нётмил вәрнэ программа урыл Тереза Пономарева

потыр ловиньтасыг. Мөтыт сапрәнин ты күщайт таквсы порат акван-атхатыгләгыт.

**Ю**вле хультум этпосыт ос яңк нәтнэ этпос овыл хөталанёт округт өлнэ хантыт, мәньшит ос ёрныт кит яныг форумьг рупитасыт. Төват США мән Нью-Йорк ұсн ялсыт, тот ма янытыл сасса мирыт савсыр тэланыл овылтыт потыртасыт. Вера Кондратьева «Традиционные знания: обретение, передача и защита» на-маим вәрмалит мағыс сасса махманув овылтыт латың тотыс.

Москва ұст ос «Сокровища Севера» фестиваль олыс, округт өлнэ хөтпанув тув тәнки маснутаныл, пормасын суссылтаңкве ос мөт мирыт халт касуңкве ялсыт. «Төрүм Маа» музейт рупитан хөтпат «ВЫгыр ёрнкол» экспозициятә мағыс овыл места висыт. Ты коньпал тәнүт пәйтнэ ос этноспорт касылыгт нөх-патсыт, тувыл эргыт эргын порат янытлан нәпакыл мүйлуптавёсыт.

**Тамара  
МЕРОВА**



## ПОБЕДА ХӨТАЛ КАСТЫЛ

## Хөнт оигпам пәсныл 74 тәл төвлыс



**Т**ы ялпың хөтал Россият ос мөт хөн мāt өлнэ мир кәсың тәл янытлэгыт. Ань Ханты-Мансийск үс котилыт сәв мәхум акван-атхатыглас. Округ кұщай нә Наталья Комарова ветераныт, война порат тәрвитың рұпата вәрүм хөтпат ос мүй мәхум пуссын Победа хөталыл янытласанэ. Тав лāвыс:

«Тының мәхумақвет, ятил ветераныт, мән ты хөнт нәмхуньт ат ёрувлылүв. Ты ялпың хөтал мā янытыл сәв мāt мүйлаве. Война порат мәхманув пилтәл фашистыт яртуңкве вәрмысаныл, тәнаныл алыщдласаныл, төваныл ювле нјавлысаныл. 1941 тәлт лүпта этпост хөнт өвылтахтам порат Ханты-Мансийск үс военкоматыл кит сөтыра сәвиткем әлүмхөлас тәнки войнан тәра вөвхатасыт».

Кирилл Иванович Гындышев Хальүс районныл Войтехово пāвылныл өлыс. Тав 1941 тәлт Москва үс ўргалаңкве разведчикыг тув тотвес. Тот хөнтлыматәт, щәмьятән хұрум щēs похоронканәпак кәтыглавес, эрттам хум та порсыс. Та сыс, ойка Германия мā Берлин үс мус хөнтлым ялыс. Такви өлнэ мātән война юи-пәлт 1946 тәлт ущ юв ёхтыс.

Софья Сергеевна Кузнецова Самарово

пāвылныл өлыс. 1943 тәлт «Красный крест» мәхум пусмалтан хаништап әстлас. Тувыл тәра хөнтлын мән кәтвес. 1945 тәл оигпам порат юв ёхтыс.

Евлампий Арамонович Осокин радио связь щирыл хаништахтәме юи-пәлт 1944 тәлт армиян тотвес. Ты хум Луговое пāвылныл өлыс. Хөнтлам мā янытәт лāглыл ёмыстә. Тав Берлин үс хөнтлым вистә. Ойка 1950 тәлт юв ёхтыс.

#### Юн тәрвит рұпата вәрсыт

Война порат юн яныгпәла ойкат, әкват ос нјврамыт этә-хөталә ўщлахттәл сәвсыр тәрвитың рұпата вәрсыт. Тан тәнүтыт, пор-

масыт, маснүтыт тәстысыт ос хөнтлын мән кәтсыт.

Евгения Афанасьевна Василькова тав әгиг өлмет Ханты-Мансийск үс рыбокомбинатыт хұл щәпитым кәсың хөтал китхуйплов сәвиткем щēs рұпитас. Хөтал сыс 250 грамм нјанил майлувес. Ты хөтпат хөнт вәрмалыт мән сәлтатанув нөхпатнэ мāгыс сәв нәтсыт.

Та порат мән округт өлнэ мирув Блокадный Ленинград үс-ныл акв сөтыра арыгтем нјврам тәнки палтаныл висыт. Тән война оигпам мус ўргалым өщвёсыт. Рүттәл хультым нјврамыт тыт өлуңкве хультыт.

Ань ялпың хөталт Югра мāt өлнэ мәхум «Бессмертный полк» акв пөхыт ёмим хөнтлым порат порслым рұтаныл хурияныл тотсыт. Хөнтлум мәхум кәстыглан мāгыс Победа хөталт нāй тәнэ мән хорамың лүптат пинсыт. Ус котилыт концерт суссылтавес, тот мәхум ййквсыт, эргысыт ос ўщлахтым ёмыгтасыт. Кәсың хөтпа щāгтым өлыс.

Николай МЕРОВ





# Сосса мир янытлан хум

**Н**ижневартовск үст нйврамыт хаништахтын магыс №2 Искусства школа ылы. Яныгман агиришит ос пыгришит тот савсыр отделениятт ос мастерской колнакытт сыре-сыр мўтрадын хаништавет. Декоративно-прикладной колнакт янге-мане рўпитаңкве ывылтахаманыл пасныл ань ты тўяг хус талыг ёмтыс. Тот Николай Гаврилович Курач тав пунктоты.

Хум нйврамыт ханишты, «Заслуженный деятель культуры Ханты-Мансийского автономного округа – Югры» ос Член Союза дизайнеров России намыл маим ылы, «Лауреат премии Ханты-Мансийского автономного округа «За развитие культуры малочисленных народов Севера» почётный звание ыныщи.

Николай Гаврилович Крым мат самыл патыс, тот яныгмас. Нижневартовск үсн 1980 тал порат вантылыс. 1982 тал пасныл катыл вярум пормасанэ савсыр мат суссылталыанэ. Тав хаништан нйвраманэ акваг янытлавет, округ янытыл ос мот мат ылыглан суссылтапытт катыл вярум пормасаныл пўмшалавет, ёвтавет. Николай Гаврилович ёт ам Ханты-Ман-

сийск үст ылум суссылтапыт вайхатасум, рўпататэ урыл китыгласум. Хум тох ты потыртас:

— Ам нйврамыт хаништым рўпитэгум, керамика тэла нөх-вөрмалтэв. Савсыр пормасыт катыл вярэв – ёнгилыт, анысаныт, ўйхул хурит, сыресыр хусапсовыт. Төванув округт ылнэ сосса мир хорамыл нётумтыанўв. Хорамыт ман хөт-ати мори ат вэриянўв, пуссын хаништыанўв – хумус лававет, маныр пёслым ылы, ялпың ўйхул хури ыныщи ман нас хорам, хоты мирн пёслуес, маньши ман ханты хорам, та маныр. Хус тал сыс нэмхотьют лўль латың ат лавсас, ман вярум пормасанув ёмас номтыл сунсыглавет, ёвтавет. Ты магыс номтанув ёмасыт. Сосса махум



Н. Г. Курач

танти хораманыл вэганыл, хотты пормас палт пёслуңкве ат те рёвыс, тән лавнувыт.

2000 тал пасныл ман матрешкат вярэв, тув ханты вильтхопит пёслэв. Ань савсыр матрешкат ылэгыт – руш ос мот махум хурит тув пёславет. Ман ос номсэв, ос манрыг ат рёви сосса хөтпа хури тув пёслуңкве. Акв тамле ут вэрсэв, Москва үст ылум выставкан то тыслэв. Ань та ханты матрешкав тот кэсалавес, я-ты, та пўмшалаве, та сунсыглаве. Тувыл тав музей Матрешки магыс ёвтвес, Москват насати тамле кол ылы. Ман ханты матрешкав ань тот хөт та ынышаве.

## Сосса мир — мўтраң махум

1986 талт ма-вөй нөх-винэ хөтпат ёт сосса колтагыл ылнэ ман ялсум. Төнт ам ывыл щёс ханты махум кэсаласанум, тән ляпанылт ылсум, хум, нэт ос нйврамыт ёт вайхатасум, потрамасум. Та порат ам сымум татем щэгтыс, амтирот номсэгум, татем ёмас махум, нэмса элумхө-

ласаквет, тән ляпанылт ылуңкве татем ёмас. Та махум ёт юрщмахтасум, тувыл та пасныл ань тыхөтал мус тән палтаныл ялантэгум.


Ёрнколытын ос вөрколытын ват нупыл нила щёс ялсум. Кэсыңёмт тот саттем ылэгум, рўпитэгум, махманум пёслыанум, тән ётаныл потрамэгум, матыр пўмшалагум. Сунсэгум, хумус вөраёгыт, хул алышлэгыт. Ань вэглум, сосса мир сака мўтраң махум — сав хул ат пувёгыт, тэнэтем катынпаттэгыт, хөталың хөтал ман турап, хул алышлаңкве, вөраяңкве тох та минэгыт. Ат та лавёгыт, лўль ман ёмас хөтал, Төрүм ат лўкамтэгыт, лўль латың ат хулыгласум. Матыр катынпаттэгыт, пувёгыт, таил щэгтэгыт. Маныр ыныщегыт, таи пасанн ўнтэгыт. Топал хөтпа тэрапаттыаныл, пөхан ўрияныл, тав ётэ потыр ос ат ыныщегыт. Ёмас хөтпа ёт тай потрамэгыт, исум щэил пиныаныл.

Округ янытыл ам сав мат ылсум — Сургутский, Нижневартовский, Белоярский рай-



Округ кўшай Н. Комарова мащтыр хум ёт потрами





оныт янытыл яласасум. Мāныщи мир ѓлнэ мāн ѓс ялсум, Хāльѹс район Саранпāвылт ѓлсум, тот сāв хури пѓслысум.

Ты тāл мастерской колнакув хус тāлэ тѓвлыс. Ам ѓтум тот сāв кāркам, мāщтыр хѓтпат рўпитѓгыт. Ты Евгения Юрьевна Потѓмкина, Жанна Ринатовна Гладий, Руслан Маратович Арсланов ос мѓт мāхум. Тāнаныл ам пуссын янытлыяну.

### Анысāн пѓщгын хум

Руслан Маратович Ханты-Мансийск ѹсн ѓс ѓхталас, мастер-класс вāрыглас, янге-мāне

тав ѓтэ āнысāн вāрсыт. Хум рўпататэ урыл китыгласлум, ѓлаль ань тав потре ловинь-тāлын:

— Ам искуства школат рўпитѓгум, нāврамыт āнысāн ос сāвсыр хусапсовыт рāктныл пѓщгуҥкве ханищтыяну. Скульптура тēла ѓвытгыт потыртѓгум, тыхал пѓслѓв, пāрт тармыл сāвсыр хурит щуртгалѓв.

— **Кāтыл матыр-āти вāруҥкве, рāкыгныл пѓщгуҥкве нāн хѓт ханищтахтасын?**

— Касыҥ туи Нижневартовск ѹст «Самотлорские ночи» наппа ялпыҥ хѓтал вāрыг-

лаве, тув сāв мāныл мāщтыр мāхум ѓхталѓгыт, пормасаныл суссылтѓгыт, рўпатаныл урыл потыртѓгыт, мāхум ханищтѓгыт. Хосат ам акв тамле хум ѓт вāйхатасум, тав Омск ѹсныл ѓхталас, наме Александр Геннадьевич Белосветовский. Лави, рāкытныл матыр пѓщгуҥкве ханищтахтуҥкве таҥхѓгын те, ам палтум ѓхталэн, ам нāнын ханищтылум. Ам атхунь кāсашасум, рўпатамныл тāртвѓсум, та ми-насум. Ты хум колѓт кит сāt ѓлсум. Такви колт ѓлы, мāщтырлан янас кол ѓныщи. Хѓтал палыт ам ѓтум та рўпиты, потырты, хумус ѓри рāкт тѓлыгтаҥкве, пѓщгуҥкве, та маныр.

Александр Геннадьевич сака ѓмас ѓлумхѓлас, мāк мāщтыр хум. Матъѓмас тав палтэ ялсум, ханищтахтасум, тот вāрум тēлам ань нāврамытн суссылтылум, пуссын аквѓѓт ѓлаль ханищтахтѓв. Ты рўпатам сака пўмыщ, ѓмас номтыл вāрилум. Юн ѓщнэ āнысāнанум

амти кāтыл вāрсанум. Сāв āны юртанум мāгыс щѓпитѓгум, мўйлуптыяну, пуссын щāгтым юн ѓныщияныл.

Николай Гаврилович лāвыс, Ханты-Мансийск ѹсн тāн 2007 тāл пāсныл ѓхталѓгыт. Тыт мирколт, Ма-вит ос ѓлумхѓлас музейт пормасаныл суссылтāлманыл. Москва ѹст хўрум выставка вāрыгласыт, акв щѓс Филяндиян ялсыт. Тѓва, пормасаныл, лāви, сака янгыт, ѓт ат то-тыglyяныл, тох тāй сāв пормас кāсаланувув.

Мāн мāвт матъѓмас тамле мāщтыр мāхум, сымыҥ хѓтпат ѓлѓгыт. Лўи мāв ѓруптыяныл, мāхманув янытлыяныл. Николай Гавриловичин сāв ѓмас, сымыҥ лāтыҥ лāвѓгум. Пустāгыл вос ѓлы, сāв ѓрнэ пормас вос вāри.

*Ханты āгиришиг Н.Г. Курач тав пѓслысаге. Нāврам кати ѓт ѹнлын хуритэ ань сāв мāt вāве.*

**Светлана РОМБАНДЕЕВА**



Р. М. Арсланов мāхум ханищты



# Сәт Өтырн, хөт Өтырн үргалан колтәглыт

**Ты накт «Төрүм Маа» музейт рүпитан мэхум рүтыг өлнэ яныг щөмьят Лельховыт, Пятниковыт ос мөтаныт урыл мирн потыртасыт. Тән «История семьи в истории страны - след прожитой жизни» нампa проектаныл щирыл нилахуйпловит суссылтап щөпитасыт.**

Ты яныг рүт мэхум Лельховыт, Пятниковыт, Гришкиныт, Юминыт ос Себуrowыт тән пуссын — Белоярский район Тугияны павыл мэхум. Ты павыл Ас я мөсыгт олы, наме ханты латңыл лававе «Тукъяк» ос мәнщи щирыл толмашлаве ке, тьи «мөсыг».

Тугияны павыл мөт щирыл ос тох толмашлахты - «тәк ййкв», ты урыл Таисья Степановна Себуrowa лавыс. Руцч учөный хум В.Н. Чернецов 1936 тәлт Ялпүс павылн Уй ййквнэ мән ялум. Ос тот хум хөтпат тәксарыг ййквнэ ййкваныл сунсум, ты өвылтыт тав потыр хансыглам.

Ань ты рүтыг өлнэ сав колтәглыт наманыл акв яныг нөпакн Анна Матвеевна Себуrowa акван-атсанэ. Ты рүт мэхум 1853-1872 тәлытныл элаль рүтмүңкве патсыт, шар сартын өлум хөтпаг Ефим Григорьевич Пят-

ников ос Дмитрий Иванович Лельхов.

Ань тыг мус сәт аквәрт мэхум ловиньтавет, тән пуссын юртыңыг, кәркамыг ос мәщтырыг өлнэ хөтпат. Тән халанылт савыңпәлэ хүл алыщлан хөтпат олсыт, ань Лельховыт опарищ наманыл — «мәнхәп» тох толмашлаве, Пятниковыт — «пятник», руцч латңыл ке лавуңкве — тьи хүлуп квәлыг хартнэ элумхөлас тох лававе.

Анна Матвеевна лавыс: «Амки рүтанум щирыл ам Лельхова ос Себуrowa. Ам яныгпәла хөтпанум иң өлманыл сыс тән потраныл хансуңкве алымасанум, тувыл төваныл пөс нөпакн хансым олсыт, тот хөнтсанум ос тыг хассанум. Ты рүпата вәрнэм порат ам рүтанумн ос өмщакв нөтвөсум.

145 тәлыт сыс мән аквәрт хөтпанув 300 сәвит элумхөласыг өмт-



Т. С. Себуrowa

сыт. Ам номсыкөмт, ань тыт мэхманув әти пуссын хүлтсанүв. Төва рүтанув савсыр мән ләкквa-мингаласыт, хөт-әти мөт савсыр үсытыт өлэгыт. Мән иң элаль тах кисхатүңкве патэв, тувыл кәсың хөтпа самын патум тәланэ тув хансуңкве эрөгыт».

Анна Григорьевна Юмина тамле накт номылматыглас, сав рүтың колтәглыт шар яныгпәлаг өпатэ Ефрем Иванович Гришкин өлум, ты тав 103 тәлэ мус өлыс. Ты эква өпатэ ос әтәтэ савсыр рүпатат кәркамыг ос мұсхалыг вәрум хөтпаг өлсыг.

Мөтаныт тән ну-пылән рөвлахтым пуссын ос акв-тох рүпитасыт. Тән тәнки хәпыт, товтыт ос мөт савсыр пормасыт вәруңкве хәссыт. Щөмьяныл хүл алыщлан, вөраян хосыт янмалтасаныл. Тувыл кәтн-паттум утаныл Салехард манос Тобольск үсыгн лувың суныл тәнки тыналаңкве тотыгламаныл.

Музейт Лельховыт, Пятниковыт, Гришки-

ныт, Юминыт ос Себуrowыт щөмьят пөс хурияныл, маснутаныл ос савсыр пормасаныл суссылтавөсыт. Тән палтаныл савсыр учөныт ос өхталасыт, пөс потрыт, Уй ййквнэ порат эргын эргыг ос ййквыт өл-хассаныл.

Венгрияныл өлум Учөный нә Ева Шмидт ос Тамара Пятникова пөс ялпың хөталыт ос пөс потрыт, мөйтыт атым рүпитасыг. Ос өтыл Тамара Романовна «Традиционные обряды Усть-казымского Приобья» нампa нөпакн хассанэ.

Тувыл тәнки рүт мэхманыл өлупсаныл өвылтыт Людмила Каллистратовна Зубакина ос Таисья Степановна Себуrowa потырта-сыг. Ётыл мүй мэхум пуссын пасан вәтан вөввөсыт, тот щәй ай-нэ сыс тән маткем рүтаныл кәстысаныл. Ос мәнлат әгитн-пыгытн лавсыт, тән тәксарыг ос кәркамыг вөс өлэгыт, тәнки сәт Өтырн, хөт Өтырн үргалан мәнаныл номим вөс өнөщияныл.

Тамара МЕРОВА



Рүт мэхум



# Мә-витув сыстамыг вос оныщилүв

**Я**ңк нәтнә этпос 16 хөталныл лүпта этпос сәтыт хөталә мус округув янытыл «Спасти и сохранить» намба мә-вит үргалан вәрмалә вәрыглаве. Ты пора сыс маныр рүпата вәраве, та урыл мә-вит үргалан мәт кұшай хум Сергей Пикунов ляххал тотнә хөтпат элы-пәлт потыртас.

Ты эрнә тәла 17 тәл сыс кәсың туй щәпитәлаве. Щар өвләт хунь вәруңкве овылтавет, округувт өлнә мяхум китыглавәсыт, җмащакв тыт мә-витув үргалаве мән ати. Төнт 68% сәвит мир ләвсыт, мә-витув сака пәңктаве ос лүльсаң үргалаве. Мөлтү тәлт тыт өлнә мир ос ты

вәрмалә урыл китыглавәсыт, 77% сәвит мяхум ләвсыт, ань мә-витув үргалым оныщаве ос акваг сыстамтаве.

Өвләт мә-вөй нөх-винә компаният сака төпалыг рүпитасыт. Ань җмащакв рүпитаңкве ләвавет, мә сыстамтан вәрмалә нупыл тән 78 млрд солкөви тасты-

сыт. Мохсаң, кәрай ос мөт хұлыт янмалтан мәгсыл акваг оль майләгыт ос сәвсыр эрнә рүпата вәрәгыт.

Сергей Пикунов ләвыс, тыт өлнә мир маньтәгыл мә-вит янытлаңкве ханищтавет. Ань ныврамыт сәдикыт потыртавет, порс мори ул вос пәхвтәгыт ос мөт лүль вәрмалә ул вос вәрәгыт. Школан ялантан агит ос пыгыт «экология» урокыл вәрыглавет.

Акцияг ләвнә тәланыл рүпитан порат округувт янытыл 1700

арыгкем сәвсыр ханищтапыт, суссылтапыт, конференцият ос мөт эрнә тәлат вәрыглавет ос 400 сөтыра арыгкем элумхолас тув тах вөвавет. Аквты порат Ханты-Мансийск үст «Спасти и сохранить» намба кина пөслан фестиваль рүпитаңкве паты. Мяхум Россия янытыл ос 50 мөт хон маньтныл тыг җхталәгыт, мә-вит урыл пөслын кинаныл тыт тах суссылтыяныл.

**Людмила  
ТЕТКИНА**

## Излучинск павылт касыл вәрыглавес

**Я**ңк нәтнә этпос 1-6 хөталытт Нижневартковский район Излучинск павылт ныврамыт касуңкве акваг-атхатыгласыт. Ты касыл хумус минас, ты урыл северный многоборье тәлат кұшайг өлнә маньщи хум Олег Андреевич Хатанев потыртас. Ань тав потре ловиньтәлын.

Тән сәлың сун ұлта поргысыт, тыныщан рөпыгтасыт, сәграп пәхвтысыт, ошща ййвөвыл җт хайтыгтасыт ос аква маньл элалы поргысыт. Ты касыл яныг хөнтлан нак 74 тәлэ төвлуме кастыл вәрыглавес.

Излучинск павылн 8 команда җхталас, пуссын акваҗт 92 ныврам олсыт. Тән Сургутский, Нижневартковский, Ханты-Мансийский, Хальүс районытныл ос Сургут Нижневартовск, Урай, Когалым ұсытныл олсыт.

Аквторыг 12-13, 14-15 ос 16-17 тәл яныт ныврамыт кассыт. Тән халанылт Сургутский районт өлнә агит-пы-

гыт нөх-патсыт. Хальүс районныл җхталам ныврамыт китыт места висыт. Нижневартковский район — хұрмит местал майвес. Агитакыдат касум спитыгыт халт Хальүс районт өлнә маньләт хөтпат нөх-патсыт. Китыт места Нижневартковский район вис. Хұрмит местал Сургутский районныл җхталам спортсменыт майвөсыт.

Мөтыт щөс касыл таквсы маньпөль этпост Сургутский район Солнечный павылт вәраве, округ янытыл өлнә ныврамыт ос тув тах вөвавет.

**Людмила  
АЛГАДЬЕВА**



## Яныгпәла хөтпат ныврамыт җт хөнтхатыгласыт

Хальүст өлнә яныгпәла мяхум Победа хөтал янытлан кастыл музей-колн вөвыглавөсыт. Яныг хөтпат школат ханищтактан агит-пыгыт җт тот хөнтхатыгласыт ос та тәрвitys порат хумус рүпитасыт, та урыл потыртасыт.

Ныврамыт тананылн стихыт ловиньтасыт, маньщи, ханты эргыт эргысыт ос ййквсыт. Та порат сөсса хөтпат войнан хумус көтвөсыт, та урыл музейт ос нәпак ловиньтан колт рүпитан нәквет ләтың ләвсыт. Төнт

мәхманув маньщи, ханты маснұтыл олсыт ос танки щәнь ләтңыл туп потыртасыт. Хөнтлаңкве ты маснұтыл тох та көтыглавөсыт, руш ләтың ос тот ханищтасыт. Тән халанылт сәв мяхум войнат порславөсыт, мошща элумхөлас юв җхтыс.

Маньщит, хантыг пуссын сымың, кәркам ос нөмса хөтпаг олсыт. Юв җхтуманыл юи-пәлт элалы сәлы үрим, хул алышцлым ос вөраим рүпитасыт.

**Мария Табун кетум  
потыр Людмила Теткина  
хансыстә**

# Нэ пыгёнтыл эргёг ос ййквёг



Салыяныл

**Л**юдмила Сергеевна Айваседа сав нйаврамың щёмыят самын патыс. Омаге-а́тяге Белоярский район Нумто павылт акван-минасыг. Овлёт тот олсыг. Тувыл Касум павыл совхозн салыт үрнэ хотпаг рупитаңкве патхатсыг. Тэн аквьёт хот нйврам янмалтасыг. Ань экваг-ойкаг киттыг-минасыг, янас мат олэг.

Щёмыянылт Людмила шар яныг нйврам. Тав маньтагыл салыңколт тотыглавес, йигрищанэ ос а́пщиянэ юн үрим олыс. Ётыл Касум павыл школа а́стламе юи-палт, а́ги Ханты-Мансийск үс педучилищан элалъ ханищтахтункве ми-

нас. Хүрум тал ханищтахтас, тувыл павлэн ювле ёхтыс, клуб-колт рупитаңкве патыс.

Тот мощ рупитас, хум варыс. Ос ойкатэн Когалым үс ляпат олнэ салыңколн тотвес. Ёрнколт олыматэн Дима пыгён самын патыс. Тав мощ яныг-

мас ос тән Когалым үсн вантлысыт.

Тот Людмила техникумт ханищтахтункве патыс. А́стламе юи-палт, нэ «Лукойл — Западная Сибирь» намба ма-вой маныл нох-винэ компаният операторыг рупитаңкве патыс. Та пасныл ань тыг мус нефтяникыт палт ты рупиты. Та рупитан матэ ляпат салы үрнэ йис маныл олы.

А́тятэ Сергей Хомаказович Айваседа, тав ань ос Когалым үс похат такви матэт салыанэ оныщим олы. Кит тал ювле хультум порат тув вантлыс. Тот йильпи колыт ос сүмьях у́нттыс, ватахкем салы оныщи. Людмила у́щлахтын хоталыт акваг тав палтэ яланты, тот колсори рупата вәри. Ома́тэ наме Татьяна Владимировна Айваседа, тав ань Нумто павылт олы.

Касың тал Когалым үст ос Русскинская павылт салыл каснэ вәрмалъ вәрыглаве. Людмила акваг тув яланты. Экват халт ёмщакв салыл каснэтэ порат вәтихал мүйлупсал майлаве.

Салың ма́хум мүйлуңкве акван-атхатыгланэныл порат «Пёс йис щирыл олнэ щё-

мья» намба касыл щёпиталаве. Тән хорамың сахил ос вәил масхатым Дмитрий пыге ёт маснутанэн суссылтэг. Ты маснутыт нэ такви юнты. Хораманэ сақыл хартыянэ, сака нётнэг сусхатэгыт.

Дима пыге ма́ниг олмёт, Людмила Сергеевна ялпың хоталыт эргыт акваг эргыс. Ань тән пёс йис тагыл олнэ хулнэ вәрмалит аквьёт элалъ тотыянэн. Пыге такви рутанэ пес олупсанылтыл ат э́ссамты. Ёсн ёхта-ланэтэн порат мольщаңыл масхатым тохта ёмыгы. Тавён тох сака ёмас.

Ань Людмила Сергеевна ойкатэнтыл киттыг-минасыг. Тав мот хум ёт олы. Тән Дима пыгёнтыл вәтихал вөр павылт у́щлахтэг. Тот лылыёп сыстам, пыге салыт ляпат олуңкве сака кәсащи.

Вөрколэн тованакт мүй ма́хум ёхталэгыт, савсыр пормасытыл пүмщалахтэгыт ос нас у́щлахтэгыт. Коланыл яныг, тот сав э́лумхолас у́щлахтункве вёрми. Ты щёмыя мүй хотпат ща́гтым үрияныл.

**Николай МЕРОВ**



Л. С. Айваседа



9 МАЙ — ПОБЕДА ХОТАЛ!

# Акиюв ёл-щёпитым мātэ хōнтыслүв

**Х**ōнт օвылтахтам  
порат кāsың  
щёмьяныл хотты  
хōтпа хōнтлаңкве  
тотвес. Мāн ань  
акв рӯтув Иван  
Михайлович  
Паланзеев, ты ам  
анёквaм āпщитэ,  
войнан тотвес ос тот  
фашистыт ёт хōнтлым  
нйлыл сакватавес.  
Улпыл арген тākыщ  
хōйвес, госпитальт  
пусмалтавес кос ос  
тот āтимыг та ёмтум.

Ань ты накт ищхй-  
пың ут хосыт сāvсыр  
вāрмaль хōнтуңкве рō-  
ви. Иван Михайлович  
наме «Мемориал» мāt  
хансым օлы, тав на-  
сати Тверь ўст «Боль-  
шие Перемерки» на-  
па савынкaнт хōнтла-  
мāхум «Бобачевский  
Бор» мāt ёл-щёпитым  
օлнётэ. Аким 1919



тāлт самын патум, ам  
омам потыртāлыс, са-  
ге армиян винётэ мус  
Хōрыңпāвылт Калинин  
наппа колхозт пред-  
седателиг рупитас. Тōнт  
иң шар мāнь хумкве,  
хōнтлаңкве вуим по-

рат вāt нупыл тит тālэ  
туп тōвлум.

Тав нēпаканēt хан-  
сым օлы, 017 частит  
лусытас. Юи-օвыл мāt  
Калининский фронтыт  
103 гужевой транс-  
портный ротат хōнт-  
лыс. Тāн матыр эрнут  
лувыл хартсыт. Тот  
хōнтлым сакватавес ос  
23 числат вāt сāграп-  
нал этпос 1942 тāлт  
āтимыг ёмтыс.

Ам āңквагим Вален-  
тина Егоровна Вар-  
сакова Свердловский  
область Бутка пāвылт  
օлы, тав палтэ ты ху-  
рит хōнтсанүв. Тот  
Иван сасгүв армият  
1942 тāлт пōслым օлы.

Титыт хурит Иван  
Михайлович ўнлы, руш  
маснутыл — пиджа-  
кыл ос галстукыл мас-  
хатым օлы, тав пōхēt  
оматэ Паланзеева Ма-  
рия Михайловна (ам  
яныг анёквaм, омам  
тав анёкватэ), Иван  
сыспалт Паланзеева  
Ульяна Михайловна,  
анёквaм мāнь эще, тав  
пōхēt Хозумов Егор,  
Ульяна ойкатэ, 1940  
тāлт.

Рӯтанув хуритыт сун-  
сыглым татем щāгтсүв.


Мāн тāн уранылт сāv-  
нув вāңкве патсүв. Иван  
Михайлович аким то-  
хи щёмьяныг аты ём-  
талас, хōнтлым хōт  
витыг та тотвес. Хот-  
ты рӯтув тах эрың тав  
ёл-щёпитым мātēн  
ялы ос уральтаве.

Ам анёквaм Анас-  
тасия Михайловна шар  
янгыг օлыс, тав сāv  
нйврамың нēг ёмта-  
лас, хӯрум нйвраманэ  
(Тарья āквум, Лати-  
мир аким ос ам омам  
Аксинья Степановна Ме-  
рова матнэ мус օлсыт).

Анёквaм ёлы-пал  
аким Устин Михайло-  
вич Паланзеев мāхум  
суытым порат, репрес-  
сия тāлытыт Ханты-  
Мансийск ўст та па-  
тамтавес. Ульяна āквум  
нила āги Валентина,  
Зоя, Раиса, Анна ян-  
малтас, тāн ань пус-  
сын щёмьяңыт, ап-  
ганыл янмалтаңкве  
нйвраманылн нētōгыт.

Омам рӯтанумн пус-  
тагыл օлнэ лāтың тē-  
тōгум. Матъёмас пēs  
хурит օныцияныл, нй-  
враманув яныг мāх-  
маныл вāңкве патыя-  
ныл.

**Галина КОНДИНА**



## Эстония кинат сунсуңкве вöвиньтälвесүв

**М**öлал кит мүй хөтпаг Ханты-Мансийск үсн ёхталасыг, ты Москваныл культура магыс Эстония Посольстват пуңктотнэ хум Димитрий Миронов ос Эдит Сепп Эстони-ят кина вәрмалит кұщаиг өлнэ нэ. Тэн округ миркол кұщайтн тыг ёхталаңкв вöвыглавёсыг. Мäхумн суссылтан магыс нила кина тыг ёт-тотыгласыг.

Өвлөт тэн ётэн үст өлнэ мäхум нэпак ловиньтан колт акван-хөнтхатыгласыт. Ань мүй хөтпаг өвыл щёс мән округун ёхталасыг, тыт тәнәтән сака мұстыс ос таи-магыс щäгтым өлэг.

Тән касың тäl нила щёс Эстония кина урыл Россия савсыр мät потыртаңкве вöвиньталавет. Тән кина пöслын рүпата-ныл сав мäхумн пүм-шалавет, сав пүмыш

тэләт урыл акваг китыглавет. Тöва кинат российский артистыт ёт акван-нётхатым пöслыяныл. Юи-өвыл тälыт савсыр мән кина-охсат пöслуңкве патсыт ос тән сав мирн сунсавет ос эсгавет.

Акван-атхатыглам мäхум өвлөт «Георг» наппа кина суссыт. Ты кина эргыт эргын эстонец-хум өлупсатэ урыл öлы. Мäхум кина сусманыл юи-пälт Эдит Сепп савсыр вәр-

малит урыл öс китыглавёс, пүмыш вәрмалит касаламаныл магыс пүмашипа лäтың лавсыт.

Ам мүй хөтпаг «Нäй Äңки» кинофестиваль урыл ос округувт акв кинаныл пöслум нак өвылтыт китыгла-сагум.

Димитрий Миронов лäвыс, тән кинофестиваль урыл öс вäгыт, ань тот каснэ магыс пищмал кётвёсыт. Эдит Сепп лäвыс, тав «Сердце медведицы» наппа кина урыл öс хұлыгластэ, тот тöва вәрмалит Нёр ляпат салыңколт өлнэ мäхум палт пöслувёсыт.

Тöва мәнщи хөтпа-нув тот öс пöслым өлэгыт, янгыщ тай артистат тот рүпитасыт.

Тувыл мүй нэ режиссер öйка Арво Ихо ёт ты кина өвылтыт уш-нув потыртам. Öйка 2001 тälт кина пöслыстэ. Ань ты кина мäхум тыт сунсуңкве вöвияныл ке, тав ос Мати Сеппинг, ты рүпатат вәрнэ магыс олн минэ хум, хот-щäгтым тах өлэг.

Ётыл мäхум тыт то-тыглам «По грибы», «Живые картинки», «Тайное общество Супиллина» эстонский художественный кинат ос «Лотте и тайна лунного камня» акв мультфильм суссыт. Тән руц потрыл тол-машлым ос лätңытыл хансым өлэгыт. Та щирыл тән сав мирн сунсуңкве вөрмавет.

**Тамара ХАТАНЕВА**

## Нэпак ловиньтан колт мүйлысыт

**К**асың тäl яныгпöль ётпост Россия яныгыл «Библионочь» наппа ётипäла öлыглы. Мүй хөтпат потрыт, стихыт ловиньтаңкве ха-ништает ос нэпак ловиньтан колн акваг вос ёхталэгыт - тув хасылтавет.

Ўсувт өлнэ мäхум касың тäl матыр тэләт өвылтыт вäңкве тув вöвиньталавет. Ты тäl тән «2019 тäl — Год театра в России» кас-тыл пүмыш вәрмалитыл суссылтавёсыт. Ань театр өвылтыт савсыр нэпакыт, ён-гилыт, касылыт щё-питälвёсыт ос тытыл мүй мäхум пүмшала-вёсыт.

Ханты-Мансийск үст нэпак ловиньтан колт акв пүмшалан на-каныл «Лаборатория успеха» намаим öлыс. Тот «Хөтал» наппа Äс-угорский театрыт рү-питан нэ Татьяна Огнёва тув вöвиньтäl-

вес. Нэ такви өлупса-тэ ос рүпататэ өвыл-тыт мäхумн потыртас ос сорт урыл мөйт мөй-тыс.

Татьяна мәнтäгыл артисткаг öлуңкве таң-хыс, туп ты номтэ шар нэмхотьютн ат лäвыг-ластэ. Тав Ванзеват пäвылт яныгмас, тот школа ос клуб туп öлыс. Тот öлыматэ тох номсыс, тувыл ул нэмхотталь ат мины, мөт мät хотьютн ўра-ве.

Тувыл хөт тärвит,

хөт кұпнит өлупсатёт öлыглас ос тав мән-тäгыл öщнэ номтэ тэ-лаг та ёмтыс, мир элы-пälт эргуңкве, ййквуңкве патыс.

«Библионочь» вәр-малё ойгпам юи-пälт мөтыт хөталёт Татьяна Огнёва «Чев, чев» спектакль ёнгуңкве Санкт-Петербург үсн ми-на-с. Спектакль Ере-мей Айпин хансум «Куккук» ос «Ўйрищ мән ёйрищанэ ёт» мөйтыг щирыл Анна-Ксения Вишнев-ская режиссёрнән щё-питавес.

Тавён ханты мäхум пёс накыт вәнэ хөтпаг Татьяна ос Тимофей Молдановыг нётсыг. Ты ёнгила-ныл ёрнкол кй-вырт суссылтаве, там-ле номт Татьяна Ог-нёва тав ты хұлтыс.

**Тамара  
МЕРОВА**





# Тарыгсав павыл мащтыр нэ



**Х**альүс район Ягрим павылт мащтыр маһыңи нэ олы – Любовь Георгиевна Бирюкова. Тав маһыңи супыт, тӧрсахит, вайт, нйрат, совъявйит юнты, сѣтапыл матыр саги ос сакныл савсыр пормас харты.

Любовь Георгиевна пӱльницат маһы леккарыг атпан нупыл кит тӱл рӱпитас, ань пенсият олы. Ты нэ ѳт Ягримт вайхатасум, маһыполь ѳтпост тот районт олнэ мащтыр махум хонтхатыгласыт.

Тав тох потыртас:

— Хӧт тӱлум порат носки амти сагсум. Омам матыр щаквщи, тав пӧхатѳн ѳнтѳгум, сунсѳгум. Та юи-пӱлт та пӧйкилум, лавѳгум, наң аһумн тамле маһы спица вӱрен, ам ѳс сагѳгум. Омамн спицал щѳпитавѳсум, сагункве та патсум. Юнтнэ нупыл тай сака ат суссум, тӧнт номсѳв, руц щирыл ѳлѳв.

**Т**увыл хунь «Спасение Югры» организация квӱлтапап-тувес, маһ, сossa махум, тыт колнакыл майвѳсѳв. Акван-хонтхатыг-лаң-кве патсѳв, савсыр маснут, тӧрсахиттув то-тавет, юнтуңкве татем тахмаясум.

Номсѳгум, хумус ам ат вѳрмѳгум, омам матыр-ӱти вӱруңкве пус-сын хасыс. Ынтсум, та-ра юнтуңкве та патсум, ѳрттам акваг мащ-тырласум. Маһыңи мах-манув аһумн суп юн-

тылтаңкве патсыт, тыи вӧви, таи вӧви, пус-сын юнтыанум, мӱй-луптыанум.

Ам Тарыгсав павылт 1950 тӱл яныгпӧль ѳт-пос 18 хӧталѳт самын патсум, тот яныгма-сум. Павылт сав Мони-ныт ѳлсыт, омам Ма-рия Степановна та рӱт нэ. Ёлнаң тот школа, лапка, пекарня олыс. Ту-выл маһ 1964 тӱл по-рат Восыңтӱртн вант-лысѳв. Ам Восыңтӱрт ос Аһыят ханищтахтасум. 1969 тӱлт школа асла-мум юи-пӱлт Ханты-Мансийск ѳсн минасум, тот хӱрум тӱл медучи-

лищат маһы леккарыг ханищтахтасум. Куль-пасн рӱпитаңкве кѳт-вѳсум, 1971-1973 тӱлытт маһы леккарыг пӱльни-цат рӱпитасум.

Тувыл Ягрим павылн минасум, омам ляпан. Тав Восыңтӱрт олыс, тав пӱлтэ ялантаңкве, нѳтуңкве. Омам 1997 тӱлт аһимыг ѳмтыс. Тав сака мащтырыг юнтыс. Тав юнтыглам супе мӧлхӧтал тыг тотыг-ласлум, сака пѳс йис тӧр. Ам пӱквпаланум моц яныгнувет, тав хо-раманэ ос сака маһит, мащтырыг юнтым ѳлѳ-гыт.

**О**мам сака сав мӧйт вӱрыс, ѳрыг вӱрыс. Ирина ягӱгитѳ аги Хан-ты-Мансийск ѳст олы, ты Альбина Никола-евна Мехнина. Тилум председателиг олыс, савсыр маһ кѳтыглавѳс. Тӱн Лӧпмуст, Тѳк ос Люлюкары павылт ѳлсыт. Ам Альбина Ни-колаевна маһыңи су-пыл юнтыслум, вӱил мӱйлуптаслум. Ойкам ѳс маһыңи супыл юн-тыслум. Махум ѳлыл ѳхталѳгыт, ам лавѳ-гум, йиен, пӧславемѳн. Маһыңи супыл мас-

хатымѳн, та пӧслахты-мѳн.

— **Ойкам хотыл ѳлы?**

— Томский об-ластыт яныгмас, на-ме Анатолий Дмитри-евич, руц хум. Ягримн рӱпитаңкве ѳхтыс, тыт акван-хонтхатасумѳн, 1973 тӱл пӱсныл ак-вѳѳт ѳлымѳн. Хӱрум нйврам яһмалтасмѳн, кит аги – Лена ос Ок-сана ос Жѳня пыгмѳн. Аһы апыгрищанмѳн ѳт нӱнъкалахтымѳн.

Ойкам маһав ѳруп-тыанэ, хунь ханты ос маһыңи передачат сус-сылтавет, хумус махум ѳлѳгыт, алыщлѳгыт маһ вӧраѳгыт, тав са-ка сунсы. Ягӱгитѳ Укра-инат олы. Щӱанѳ ѳс тот олыс, хунь хонт ѳвылтахтас, тав аһимыг ѳмтыс. Оһыпум ѳлме порат тув акваписыг ялантаусѳв.

Аһы ты колувн маһ кӱсың ѳщлахтын хӧтал атхатыглѳв, матыр юнтѳв, ханищтахтѳв. Семинарын яланта-нѳм порат ойкам лави, манрыг тув минѳгын, наң тох пуссын ва-гын. Ам ювле потыртѳ-гум, аһи, ам сав пормас вӱруңкве ат хӱсѳгум, ханищтахтуңкве па-тѳгум.

Хунь сossa махум акван-атхатѳв, маһнти маснутыл масхатѳв, шар ѳрттам ам колум, пуссын ам рӱтанум. Номтум татем ѳмас.

Любовь Георгиев-на — хӧтпа нупыл сы-мың ѳлумхӧлас, там-ле мащтыр, кӱркам нэ. Потре магыс пӱмащи-па лӱатың лавѳгум. Колтагыл махманэ ѳт пус кӱт, пус лагыл вос олы, Нӱй-Отыранѳн вос ѳргалаве!

**Светлана РОМБАНДЕЕВА**



Любовь Георгиевна сӱкныл харты



# Акв этипалат махум музейн вöвыглавёсыт

**Т**ы этпос 18 хоталэт Россия янытыл акв пумыщ вярмалъ вэрыглавес, руц латңыл тав тох лававе – «Ночь музеев – 2019». Ты кастыл округувт рүпитан музейт пуссын та үщлахтын хоталт эти мус рүпитасыт ос үст öлнэ мир танти палтыланыл вöвыгласаныл.

«Төрүм Маа» намп музей та хотал öс рүпитас. Тән рүпитан манылт «Ночь у очага» намп проект-тэла вэрыгласыт. Савсыр пумыщ тот öлыс, ёрнкол түщталавес, амщит амщын кол öлыс, мот мат ос каснэ ма. Махум тув ёхтуманыл порат нэ-пак-лөмтыл майвёсыт, касың мат тән пöсыл түщтувёсыт, хотьют пöсанэ пуссын түщтым öлсыт, тән мүйлупсал майвёсыт.

Савсыр суссылтапыт öлсыт. Öвлэт ханты ос маныщи нэквет танти юнтум супаныл, савсыр хораманыл ос лэгыл маснуганыл мирн

суссылтасаныл. Касың юнхсатнэ нэ наме лавес, маныр тав юнты, та урыл потыртавес.

Та юи-палт Анатолий Вадичупов такви вэрум сажквылтапанэ, нэрнэйиванэ ос тэрыг-сыплувйиванэ мирн суссылтавёсыт. Хум мощ потыртас, хоты йивныл ос манах хотал манос этпос тав тананыл вэриянэ.

Мот мат махум стыхит ловиньтасыт, эргысыт. Тув ёхталам махум хотьют касащас, пуссын матыр суссылтаңкв вёрмыс. Сака пумыщ öлыс, тән тыгле-тувле ёмыгтасыт, пүмщалахта-сыт.



А. Вадичупов потырты

Ты музейт рүпитан хотпат матыр пумыщ тэла вэрнэныл порат акваг пасан вэрыглэ-гыт, танти сöламат пайтэгыт, нянь вэрнэ күрт атың нянь вэрёгыт, савсыр лүптаң шай пайтэгыт. Тувыл ты тэ-нут арталаңкве мүйлын мир вöвияныл. Махум щэгтым тув минэгыт.

Тамле тэнут түп аращ палтым вэруңкв рөви. Юн тамле атың тэнут

ат тэлы. Хотьют каса-щас, тав нянь ёвтис, тынэ титсат солкөви öлыс.

Онтолов щёс юи-палт мүйлын махум пуссын музей колн вöввёсыт, тот Зоя Никифоровна Лозямова эргыс. Ты яныгпала ханты эква Касум павылыныл öлы, сака сав эрыг ваг, так-ви эрыг вэруңкв хасы.

**Валентина  
ВАСИЛЬЕВА**



Меровыт



А. Брусницин



Ф. Иштимирова

## Лүймә сәрипос

(Северная зоря)  
№10 (1196), 23.05.2019  
**Соучредители**  
Дума, Правительство  
Ханты-Мансийского  
автономного округа – Югры  
**Издатель**  
Департамент общественных  
и внешних связей Ханты-  
Мансийского автономного  
округа – Югры

## Редакция

Врио директора –  
**Кондина Г.Р.**  
Телефон (3467) 33-22-72

Заместитель гл.редактора –  
**Кондина Г.Р.**  
Телефон (3467) 33-22-72

Ответственный секретарь –  
**Узель В.В.**  
Телефон (3467) 33-23-09

**Адрес редакции и издателя:**  
628011, г.Ханты-Мансийск,  
ул.Комсомольская, 31  
тел./факс (3467) 33-17-52

**E-mail:** [gazeta@khanty-yasang.ru](mailto:gazeta@khanty-yasang.ru)  
Газета размещена на сайте  
[www.khanty-yasang.ru](http://www.khanty-yasang.ru)

## Отпечатано:

ООО «Новости Югры-  
Производство» г. Сургут,  
ул. Маяковского, д. 14.

Индексы **04399, 54399**

Тираж **1710** экз.

Заказ **2238**

Цена свободная

Мнение авторов  
публикаций не  
обязательно отражает  
точку зрения редакции.

Газета зарегистрирована  
Управлением Федеральной

службы по надзору  
в сфере связи,  
информационных  
технологий и массовых  
коммуникаций  
по Тюменской области,  
ХМАО-Югре и ЯНАО.

Свидетельство  
о регистрации  
ПИ №ТУ 72-00795  
от 23 января 2013 г.